

Namaste zum letschtae

So, mit eme bildli vom wohl bekanntischtae gebaeude vo indiae luet ich de wohl letschi wetterbricht us dem land ii, mini edli ziit in indie isch naemli i gnau 8 stund z end...

Well ich scho laenger nuet me gschribae han und drum saelber d helfti scho fasch vogaessae han, isch de wetterbricht memento-maessig anti-chronologisch, sprich ich vozell rueckwaerts, und irgendwenn hoert s denn sicher eifach vo saelber mol uuf... hoffae das klapped...

Letschtae obed in Whitefield

Han miin letschtae obed mit 3 generationae indiae vobrocht: brianca, 15i; padma, oepae 25i, und d grossmuetter, um di 90i; und han mol nomol so richtig doerfae mit de finger aessae... da chani naemli noch 4 wuchae in indiae umaereisae langsam zimli guet (so dass ich s tibetische staebli aessae scho fasch vogaessae han...)



Taj Mahal

Jup, und a miim 2.-letschtae tag hani s sogar no gschafft de groessti liebesbewies vomene maa a sini frau aazluege... isch scho no schoen das ding (drum gits jetz do grad nomol es foeteli), vor allem so lang s no wiis isch und nonid voll schwarz vom abgas vo de autos do...



Am chlinae zche vom himalaya

Ganz in nordae (ladakh) hani s leider nid gschaft, aber eimol bini immerhin uf knapp 3500m ue gwanderet, begleited vomene hund wo mir eifach no- resp. vorusgloffae isch...



d gegend um manali isch wunderschoen, und vor allem schoen ruig, und s haet frischi luft, und s isch nid so heiss we in delhi... (vo dem her freu mi scho chli uf d schwiiz, und ich mues unbedingt au dihei chli meh i d berge go wandere (isch nid s erscht mol wo ich mir da vor nimm, falls es susch no interessente haet, bitte meldae, denn klappt s villicht mit chli gruppaedruck chli besser...))

Abgeseh vom hund und eim wanderer vo duetschland hani uf dere wanderig au mol fuer oepae 6 stund kein mensch troffae (und mich drum au chli voloffae, well wegwiiser oder so gits do nid, susch hetted d guides jo kan job meh). Das heisst aber nid dass es im nordae kei luet het, we me uf dem foeteli gseht:



Geburtstag vom Dalai Lama

Am 6. juli haet his holiness (H.H.) sin geburi gha, und de isch in dharamsala, em sitz vo de tibetischae exilregierig (und em neuae standort vo dere schuel won ich underrichted han) maechtig gfiired wordae (mit luschtigae taenz und so...). Leider isch de dalai lama selber aber chrankheitshalber nid aawesend gsi :-(

Defuer isch dharamsala an und fuer sich no nett, und wenn ooper luscht haet zum da selber intensiv z erlebe, sowiit ich weiss haet mini schuel bis jetz no kan nochfolger fuer mich, und s neui schuelhuus isch wunderschoen im gruennae ganz noch bimene fluss... und da foeteli isch uebrigens grad no en bewiis dass ich aso wuerkli immer d woesch selber und vo hand gwaeschae han...



Genau, und well mini schuel ebe mit schueler und de 3 huend vo bangalore uf dharamsala zueglet het, isch da au de ort gsi won ich minae tibetischae fruendae han moesae tschuess saege... ich hoff schwaer dass ich mini schueler und lehrerkollege irgendwenn uf ere reis noch tibet wieder gseh...

Delhi – el capitale

Delhi isch, obwohl groesser als bangalore, um einiges organisierter, zumindest was de vochehr aabelangt, si haend sogar e metro, und d rikschas und d bues fahred mit eme umweltfreundlichae gas namens cng... und obwohl eigentli bangalore de titel „garden city“ treit, haet s in delhi meh und vor allem schoenere paerk...

defuer haet s no chli meh baettler als susch ueberall, und im schnitt is so 40 grad heiss, do mag me sich amigs chum me bewege... ich han zum glueck choene binere kollegin inere edlae und vor allem klimatisierte grossae wohnig huusae...

Delhi isch au no edel zum schoppae, und d touts saeged eim do nid we in bangalore „hello, my friend“, sondern sogar grad „hello, boss, seeeeeeee heeeeere“...

Und maenner am haendl hebae gseht me au do:



Mumbai/Bombay aka Bollywood

Han leider kei stars vom hindi-cinema troffae, aber defuer 4 taeg mit wohl es paar vo de cleverstae inder vobrocht: dank em vijay sinere schwoester hani uf em glaend vom IIT choenae uebernachtae, und IIT (India Institute of Technology) isch nuet anders als e ETHhoch10, oepae 50000 studis probiered joehrlich d pruefig, und sind fuer das +/- es johr voll am bueflae, und 2000 naemeds pro johr (und ein vo dene luet woni kenneglernt han isch under de top 100 gsi, und ersch no 3 johr fruehner a d IIT gangae als a andere...). Aber s ding isch ebe wenn s denn mol d pruefig gschaft hend, denn hends es easy laebae a de uni und spoeter en job uf sicher... es studizimmer gseht zum biispiel so us:



Was krass isch a mumbai isch s zugfahrae (und ich mein jetz nid waeg de truuriage aaschlaeg vom 11/7): d zueg sind - we s do halt so isch mit vochehrsmittel - immer voll. Das isch jo nued neus... s problem do isch aber dass die luet wo woend iistiege so angst haend dass s kan platz bechoemed, dass s inaerenned bevor dass di luet wo wetted usstiegae e chance dodezue bechoemed. So pralled a jederae station eifach 2 massae ufenand, meh ghoert schrei und gspuert ellboegae, und de chesi isch froh dass d inder im schnitt spuerbar chliner sind als er...

GOA

Goa isch wohl de flecke indie wo fasch alli kaenned, und wohl jede mit sun, fun und strand assoziert (und di eintae wohl no mit es paar andere sachae...). de strand isch zwor do gsi, aber d sun ebe nid so (und drum au nid so de fun), well ich bi nid aelege in goa aacho, sondern de kolleg monsun haet gfundae er weli au... so isch mer nid vill anders uebriglibae als es paar mannae bim uebers gras raennae (bi schoenstem wetter, irgendwo in duetschland) zuezluege und chli selber im rege go raenne (uebrigens am gliichae ort we da matt damon in „bourne supremacy...“)



Tibet in suedindie

Bevor dass ich denn richtig uf reise begeh han hani mit em karma, em compilehrer, no en 2taegigae usflug in suedae gmacht, und zwor nid anen strand, sondern meh so was we e pilgerreis: mir haend 2 buddhistischi tempel bsuecht und sind denn au no is TCV (tibetan childern village, e schuel gruended vo de frau vom dalai lama) go en neffe vom karma (b)suechae... Isch cool gsi so vill moench ufeme huufae z gseh, seg s am obed, wenn s dur d gassae schlenderet und ihri text uswendig lerned oder am morgae bi de sogenannte "debate", doet toends di glernte sachae z zweite aenand an chopf werfe, und jedes argument wird vomene haendeklatsch begleited:



Dass es aber au „unpazifistisch“ moench git bewiist s folgendi foti:



Multikulti-tschuess party in whitefield

Vor oepae emene monet haend mini schueler ihri first certificate pruefig gha, und well da gliichziitig au grad de letschi schueltag gsi isch, und ich 3 taeg spoeter uf reise gangae bi, isch da en guete grund gsi zum fiere... und das haemmer denn au... tanzendi luet us oepae 6 nationae, natuerli d tibeter, denn es paar indische wanderkollege vo mir, und 3 maedels vo duetschland, spanie und russland (a dene haend vor allem mini schueler zimli freud gha (und mit chli alkohol sinds au nuem so schuech gsi...))

Zwuesched innae haet ein vo de schueler denn no es tibetischs liedli uf de gitare gspillt, und denn haemmer no so richtig russaedisco gmacht, was vor allem au d russin ganz cool gfundae haet (aber au de chesi, so haet er wenigstens mol wieder zu gueter musig choenae tanzae...)

Essae (eimol meh...)

Und au damol chunnt miis liebligsthema wieder... han no es paar mol meh d glaegeheit gha indis ch aessae, en indischae kolleg woni bim chlaettere kenneglernt han haet gmeint siis mami chochi ganz fein, und mir moessed mol vobii cho... tja, und so haet s oepae usgseh:



I dem faechli unnae rechts chiemti no pickles dri, das isch in extrem salzigs salz iigleits gmues, und da isch glaub so oepae di einzig spies do woni nid gern ha... susch isch alles hammer, ich vomiss es jetzt scho (au wenn ich mich uf (rind-)fleisch und knackigae gruene salat huet z oebed freue... (dankae, mami!))

Waemer scho grad bim thema sind, oepis wo mer no meh wird faehlae als es esse do isch wohl es trinkae (und dodemit mein niid alkohol, ich bi glaub no

nie so abstinent gsi we i de letschtae 5 moenet, und ich freu mi au sehr uf es
glas feinae rotwii huet zum znacht!), nei, ich mein de super feini chai wo s do
halt eifach a jedem eggae fuer 5 rupie (12 rappae) git, und au di vielfalt a
frisch gmachtae fruit juices und milkshakes (papaya, mango etc.) und natuerli
d lassis, und frischi kokosnusmilch (direkt us de nuss) usw...


Der wanderer ist des leeches lust

Waeg dem dummae memento-stil hani jetz scho 2 mol vo „wander- und
chletterkollege“ gschribae, wani demi mein sind es paar luet vo de „karnataka
mountaineering association“, das sind zwaegi ((eimol meh und leider:) vor
allem) jungs, und eimol bini mit dene es weekend i d berge, gnauer i d
western ghats, und well die im weste sind isch de monsun scho doet gsi, und
s haet 2 taeg uebelst graegnet, schlimmer als jedes pfila woni bis jetz erlebt
han... s isch aber trotzdem cool gsi, mol chli is gruene z cho (oder besser s
graue, d sicht isch wuerkli uebel gsi...) drum haemmer au kei elephantae
gseh, aber immerhin elephantae (dh grossi Fuessabdrueck und ebe
solchi (entschuldigung da wort) „scheisse“)...

Aber daefuer hani mit es paar andere tierli bekanntshaft gmacht, vo de
groessi her sind die grad oepae s gegeteil, oepae 1 bis 4 cm lang, we en
wurm aber mit ueblae suugnaepf rundumae: bluetegel... und ich bi aso nid
fruend vo dene tierli... well die sind mega glitschig, und wenn sich sones teil
mol so richtig feschgsuuged haet, denn bringt mes fasch nuem weg, und
wenn, denn blueteds uebel und hoert fasch nuemae uf... gwuessi luet haend
am schluss nuemmae es wiises, sondern es rots t-shirt gha...

India rocks - St. Bangalore open-air

Jup, und denn haemmer au mol no chli kultur gha do z bangalore... indie isch
voll uf rock, und drum haet s es open-air geh... leider sind d inder vom
musigtil her us minere sicht no es paar johr hinaedrii, hardrock isch do voll
im trend... so han ich sitt langem mol wieder luet gseh headbangae... und da
in indie... und was no vill krasser isch, (fasch) ohni drogaeiifluss (siehe flyer
(„fasch“ saegi well so 100% isch da nid iighaltae wordae (aber s isch also s
ersch mol gsi wo ich in bangalore so en speziell suessae duft han doerfae
schmoeckae...)))



ah jo, und aagfangae haet das open-air (mit 3 bands) oepae am 6i, damit s am 11i denn au wieder fertig gsi isch... (11.30 isch do polizeistund ;-))

Platzmangel und 2 voschiedeni indiae

Ich han wiiter obae scho gschribae dass es z b i de zueg in Mumbai riisae eng isch, aber nid nu doet werded d luet biiged, au in rikschas haet e 6 choepfigi familiae oder e halbi schuelklass locker platz... und imene jeep (uf gwuessae strossae moend taxis jeeps sii, damits ueberhaupt fuersi choemed) bini mol mit 24 andere luet ghocked... so haet s uusgseh (und sich aagfuehlt):



Es anders mol bini mit 4 andere luet imene buesli vornae ghocked, grad nebed em fahrer, und ihr choend eu oepae vorstelle wo de schaltchnueppel denn wohl gsi isch...

Uf em hiiweg zum taj mahal simmer uf 5 sitzplaetz im zug z zehnte ghocked, und am bodae haet s au no es paar luet gha (sitzend und stehend...)

Aber s mues nid immer so sii: uf em rueckweg bini im expresszug gsi, anstatt 4.5 stund nu 2, anstatt 2 ventis e klimaaalag, anstatt erebettlerin wo singt langwiiligs liftmusiggedudel, und anstatt mit em nochber schwaetzae spilt jeda chli uf siim handy umae... Churz gseit, es git nid nu ei indie, sondern 2, und ich bi nid sicher welles das mer besser gfallt...

Crazy india

Au susch git s no es paar interessanti sachae ueber das land z saege.

Haender zB gwuesst, dass...

...di meiste auto links kan rueckspiegel haend (de wuer irgendwenn eh „abgfahrae“ werdae)?

...di meiste rickschas und trucks zwor en blinker hend, de aber nid bruched, sondern de arm usaehed we mir bim velofahrae?

...uf jedem lastwagae hinae druf stoht „please sound horn“ (und da ebe au fliisig gmacht wird)?

...wenn es auto de rueckwaertsgang inaetuet, denn macht s nid nu eifach „piip piip“ we bi uesnae lastwaege, sondern aes toent we irgend en ringtone vomene handy?

...d strossae meistens vo luet (primaer fraue) vo hand putzt werded (und nid mit eme bese mit eme langae stil, sondern so dass s sich di ganz ziit moend buckae?)

...au baumstaem vo hand vosaeged werded?

...uf em bau fasch so vill frauue we mannae schaffed (und d frauue kann rundae helm haend, sondern en flachae, damit s zB e schuesslae mit zement uf em chopf choend traegae)?

...jede bus mindestens 3 voschiedeni abfahrtsziitae haet, je noch dem waer das me froget?

...in bangalore so zimli alli it-firmae mit em edle glas-spiegel-palast votrette sind: ibm, sap, microsoft, yahoo, intel, sun...?

...in Goa d vochehrsschilder vo Coca-cola gsponsort sind?

Wenn me jo ines fremds land goht, denn macht me immer es paar erfahrigae... ich han zB glernt, ...

...s schraege chopfschuetlae vo de Inder mehrheitlich richtig entweder als „jo“ oder „nei“ z interpretiere

...e stroos ueberquere, au wenn d autos nid woend das ich das mach

...usere 200 rupie strof a d polizei waeg einbahnstress missachtae e 50 rupie „gschenk“ an polizist z machae

...usere flaeschae trinkae ohni d flaesche mit em muul z beruehre

...esse ohni messer und gablae und staebli (defuer mit de rechtae hand)

Wani gluecklicherwiis nie han moesae lernae (resp selber uusprobiere) isch fuer was das me di link hand den ebe bruucht (ich han immer wc-papier debii gha...)

Zum schluss...


Die 5.5 Moenet do sind voll schoen gsi, friedlich und spannend und sehr interessant, vor allem dank dene vielae naette luet won ich ueberall troffae han... d inder sind sehr hilfsbereit, amigs sogar chli z fescht, 2 mol isches passiert dass en inder imene bus ufgstandae isch und mir haet welae siin sitzplatz aabuete.. krass, oder?

Und indie isch es land wome inert chuerzester ziit (zB waehrend 15 minutae busfahrt) jenschi stimmigae chan duraemachae:

Stuunae ueber di wunderschoen landschaft, sich ufrege ueber es wiiters unnoetigs gehupe, drueber lachae dass irgendwo en aff friedlich mit usgstrecktae bei ufeme stei hocked, unglaeubig zueluegaae we de busfahrer ufzmol amene tempel churz aahaltae, d gloggae lueted und schnell goht go bettae, und denn truurig und nochdenklich waerde wenn me am strossaerand wieder esbettlerchind gseht...

und am schluss vo dere busfahrt hani denn no waehrend 15 minutae diverse inder im abstand vo oepae 50m amene fluss bim „freiluftkackae“ doerfae zueluegaae...

Als abschluss do no es chlises zitat vom dalai lama, wo noch minere erfahrig do nid nu fuer d tibeter es leitmotto isch, sondern ebe au fuer d inder:



do saeg ich nu: genau (und ich glaub de tibetisch bueb isch au dere meinig...)



Liebi gruess und bis bald wieder mol live irgendwo i de schwiiz (oder au susch irgendwo...)
Marcel / chesi / cheese